



Broj: 02/2-05-1-176/18  
Sarajevo, 22. 1. 2018.

БОСНА И ХЕРЦЕГОВИНА  
ПАРЛАМЕНТАРНА СКУПШТИНА БОСНЕ И ХЕРЦЕГОВИНЕ  
SARAJEVO

PRIMLJENO: 26-01-2018

Organizaciona jedinica	Klasifikaciona oznaka	Redni broj	Broj priloga

### ZABILJEŠKA

sa sastanka delegacije Svjetske trgovinske organizacije s članovima Komisije za vanjsku i trgovinsku politiku, carine, saobraćaj i komunikacije Doma naroda i Komisije za vanjsku trgovinu i carine Predstavničkog doma PSBiH

Sarajevo, 22.1.2018.

U okviru posjete delegacije Svjetske trgovinske organizacije Bosni i Hercegovini, odnosno Parlamentarnoj skupštini BiH održan je sastanak predstavnika Komisije za vanjsku i trgovinsku politiku, carine, saobraćaj i komunikacije Doma naroda PSBiH i Komisije za vanjsku trgovinu i carine Predstavničkog doma s predstavnicima Svjetske trgovinske organizacije (WTO).

U ime Komisije za vanjsku i trgovinsku politiku, carine, saobraćaj i komunikacije Doma naroda PSBiH sastanku su prisustvovali: Sead Kadić, prvi zamjenik predsjedavajućeg, Mario Karamatić, drugi zamjenik predsjedavajućeg, i Nenad Pandurević, sekretar Komisije, a u ime Komisije za vanjsku trgovinu i carine Predstavničkog doma: Šemsudin Mehmedović, predsjedavajući Komisije, Nikola Lovrinović, drugi zamjenik predsjedavajućeg, i Mensura Beganović, članica Komisije. Sastanku su također prisustvovali: Mirsada Bukarić-Kovačević, rukovoditeljica Sektora za međunarodne odnose i protokol, Kristina Milošević, stručna savjetnica u Komisiji za vanjsku i trgovinsku politiku, carine, saobraćaj i komunikacije Doma naroda i Radomir Marjanović, stručni savjetnik u Komisiji za vanjsku trgovinu i carine Predstavničkog doma.

Delegaciju Svjetske trgovinske organizacije činili su Atanas Paparizov, ambasador Republike Bugarske pri Svjetskoj trgovinskoj organizaciji i predsjedavajući Radne grupe za pristupanje Bosne i Hercegovine Svjetskoj trgovinskoj organizaciji, Maika Oshikawa, vršilac dužnosti direktora Odjela za pristupanje, i saradnica Anna Varyanik. Delegaciju je pratio Nenad Ključar, član Pregovaračkog tima BiH za pristupanje WTO-u.

U ime obje komisije goste je pozdravio Šemsudin Mehmedović, predsjedavajući Komisije za vanjsku trgovinu i carine PDPSBiH. Izrazio je zadovoljstvo posjetom i zahvalio se ambasadoru Paparizovu na iskrenoj podršci koju je pružio našoj zemlji od stupanja na dužnost predsjedavajućeg Radne grupe za pristupanje BiH, kao i na konstruktivnim razgovorima koji su s delegacijom PSBiH u decembru prošle vođeni u Buenos Airesu.

Istakao je da su članovi Parlamentarne skupštine BiH uključeni u aktivnosti pristupanja Bosne i Hercegovine Svjetskoj trgovinskoj organizaciji, te da će uložiti napore i dati punu podršku nadležnim institucijama BiH kako bi se ove godine ubrzao proces i okončali višegodišnji pregovori sa WTO-om, koji su počeli još 1999. godine.

Predstavnici obje komisije naglasili su da u našoj zemlji, uprkos kompleksnosti same strukture a time i političke situacije, postoji puni konsenzus svih političkih stranaka, kao i politička volja svih institucija za što brže okončanje preostalih bilateralnih pregovora i za pristupanje Bosne i Hercegovine WTO-u. Izrazili su zabrinutost da bi bilateralni pregovori sa Brazilom, Ukrajinom i Rusijom mogli biti prepreka procesu pristupanja naše zemlje WTO-u, te zamolili ambasadora Paparizova za podršku u vezi s tim.

Poslanici i delegati iz nadležnih komisija oba doma PSBiH poručili su da će punopravno članstvo Bosne i Hercegovine u WTO-u biti snažan podsticaj za razvoj ekonomije naše zemlje, kao i ispunjavanje važnog uslova za nastavak procesa evropskih integracija Bosne i Hercegovine.

Ambasador Paparizov istakao je da je ohrabren punom posvećenošću predstavnika najvažnijih institucija BiH okončanju pregovora o pristupanju BiH WTO-u, te je informirao prisutne poslanike i delegate iz PSBiH da će sastanak Radne grupe za pristupanje Bosne i Hercegovine WTO-u biti održan 8. februara, a nakon toga još jedan u maju ili junu ove godine u Ženevi, te izrazio optimizam da će na tim sastancima i pregovorima s pomenute tri zemlje biti postignut napredak koji bi omogućio Bosni i Hercegovini da potpiše Sporazum o pristupanju WTO-u.

Konačna odluka o članstvu Bosne i Hercegovine u WTO-u trebalo bi da bude donesena 27. jula ove godine, na sastanku Generalnog vijeća WTO-a, informirao je prisutne ambasador Paparizov i dodao da će on i njegov tim učiniti sve što je u njihovoj moći da Generalno vijeće tada potvrdi Sporazum o pristupanju naše zemlje WTO-u.

Predstavnici obje komisije informirali su ambasadora Paparizova da se u oktobru ove godine održavaju opći izbori u Bosni i Hercegovini, te izrazili nadu i potvrdili spremnost da se Sporazum o pristupanju BiH WTO-u ratificira i u Predstavničkom i u Domu naroda PSBiH prije zvaničnog početka predizborne kampanje u septembru ove godine.

Zahvaljujući se ambasadoru Paparizovu i njegovom timu na posjeti i izuzetnoj angažiranosti u procesu završnih pregovora o pristupanju BiH WTO-u, članovi Komisije za vanjsku i trgovinsku politiku, carine, saobraćaj i komunikacije Doma naroda i Komisije za vanjsku trgovinu i carine Predstavničkog doma PSBiH, izrazili su nadu da će u julu ove godine biti donesena pozitivna odluka za Bosnu i Hercegovinu, te da će od jeseni naša zemlja postati članica Svjetske trgovinske organizacije.

Zabilješku pripremio:



Nenad Pandurević,

Sekretar Komisije za vanjsku i trgovinsku  
politiku, carine, saobraćaj i komunikacije Doma naroda

Dostaviti:

- Komisiji za vanjsku i trgovinsku politiku, carine, saobraćaj i komunikacije Doma naroda
- Komisiji za vanjsku trgovinu i carine Predstavničkog doma
- Komisiji za vanjske poslove Predstavničkog doma
- Sektoru za međunarodne odnose i protokol
- a/a

1. 1. 1.